

*Deskrisaun badakkona ba visita iha Tapor, Foho Uat*

06 Maiu 2007

Susana Barnes

Knua tuan komunidadade Uat nian hamrik iha foho oan ida naran Tapor. Molok invasaun Indonesia uma fukun komunidadade Uat nian (ne'be mos bolu 'Sepulu Nera') hamrik iha knua tuan. Iha momentu invasaun Indonesia uma sira ne'e sunu mutuk, ohin loron ita bele hare'e hetan fatuk hada tuan uma fukun sira nian, fatuk lulik, ai-to'os, no mos bosok sira iha knua tuan.

Hafoin independesia komunidadade Uat komensa hari'i fila fali sira nia uma fukun iha knua foun. Estruktura foun sira ne'e komunidadade bolu 'simples' tamba dala ruma la konsegue halo tuir tradisuan arkitektonika tempu uluk nian.

Tuir informasaun ne'be membru komindade hato'o mai hau, durante tempu funu nian dala barak Falintil sira mai subar hela iha Tapor inklui mos komandante Deker.

Dalan atu sae ba knua tuan mak naruk no klot. Uluk sei iha odamatan nain tolu atu bele tama ba knua. Ema husi uma kain husi grupu Mane Munun nian (hare'e ba dokumentu seluk) nia knar atu tau matan ba odamatan sira ne'e.

Fatin tuan uma Lori Ubu (DSCN1551.JPG)

Membru komunidadade sira mak explika mai hau katak iha tempu beiala sira asuwain sira mak halibur malu iha fatin uma Lori Ubu nian molok atu halo funu. Iha fatin ida ne'e sei iha 'biru' ida (ai-hun ida) ne'be tuir ema nia fiar mak lulik. Biru ne'e mos bolu 'Bauk Besikoru', biru seluk mos hamrik iha uma Bili Ubu nia fatin niru ne'e naran 'Larantuka bosok'.

Fatuk fitun (DSCN1552.JPG, DSCN1553.JPG, DSCN1554.JPG)

Fatuk fitun ne'e komunidadade usa hodi kalkula lo-los bainhira atu mosu tempu halo seremonia 'Luli Api'. Ba leten oituan husi fatuk fitun uluk hamrik uma Loe Boe ne'be uluk komunidadade mos rai sira nia tambor no tala. Katuas lia nain sira hato'o mai hau fatin ne'be uluk sira subar hela tambor no tala (?) (DSCN1555.JPG).

Fatin tuan uma Duas Mali (DSCN1556.JPG, DSCN1558.JPG)

Fatuk lulik uma fukun Duas Mali nian naran 'fatuk adi'. Uluk bainhira membru husi uma Duas Mali atu funu sira lori sira nia sasan funu (surik, kroat etc.) ba 'fatuk adi' molok sira ba Lori Ubu. Membru uma Duas Mali mos bolu 'To'os no tua' – tamba sira mak tun husi foho ba rai fehan (area Maliana) no hatene rai ida ne'e nia lulik.

Besik, fatin tuan uma Duas Mali nian mos hamrik ai-to'os ida ne'ebe Senhor Abel Pereira mak informa mak 'ai to'os mane' ida. Lia nain sira mos explika uluk bainhira uma nain sira tenke hadia ka hari'i fila fali sira nia uma, sira hili mane ida no feto ida ne'be tenke hein uma iha ai-to'os ne'e to'o uma hotu ona.

Mali Ela (chefe suku iha tempu Portugues nian) nia hakoi-fatin (DSCN1559.JPG)

Uluk (iha tempu Portugues ona) bainhira komunidadade atu lori ema ba hakoi sira falun mate-isin iha tais ida hafoin ida ne'e mos falun iha biti ida. Tuir adat (kultura) mate-isin tenke hakoi ho ulun

iha direksaun loro sa'e no ain-liman ba loro monu. Iha lian Kemak mos bolu tradisaun ida ne'e 'tuba lelo'.

Fatuk 'hapara bosok' (DSCN1560.JPG)

Membru komunidadade mos hatudu mai hau fatuk boot ida ne'be sira konta uluk katus no ferik sira lori foinsa'e sira ne'be namora malu subar hela. Sira lori foinsa'e sira ba fatin ida ne'e atu sira 'teme lalais naran' se sira lae koalia sira bele hetan buat a'at ida. Bainhira foinsa'e sira teme naran ba malu (ka konfesa sira nia hahalok) sira mos tenke lori asu ida hanesan multa ba sira nia hahalok. Representante ida husi uma Liko Loko baku asu to'o mate hodi 'apresenta buibere no buibere nia naran' ba beiala sira.

Fatin tuan uma Bili Ubu nian (DSCN1563.JPG)

Uma nain sira konta mai hau katak militar Portugues ida naran Tenente Falcão mak naok fatuk lulik uma Bili Ubu nian. Iha fatin tuan uma nian mos iha bosok ida naran 'Leto Loe' no ai-to'os ida naran 'Falo Loe'.

Fatin Tuan uma Leo Boe (DSCN1562.JPG?) DSCN1567.JPG

Uma Leo Boe uluk hamrik iha foho Tapor nia tutun. Uluk komunidadade Uat nia tambor no tala (gong) maka rai hela iha uma ida ne'e.

Bosok Mau Koli (DSCN1571.JPG)

Uluk komunidadade rai hela liman etun iha bosok ida ne'e hodi tahan sira nia ai-han husi gafanhutu, halo, lalar sira etc.